

楊文恪公文集

楊文恪公文集卷五十六

碑誌

知縣丁公墓志銘

大尹丁公易箕時謂諸子銘墓必屬于既而其子
灝狀公家世履歷偕弟來請公以予爲能知已尚
可辭耶按狀公早受詩於傅太叅粲輝受易於丁
陋菴秉莖成化戊子以邑庠生中江西鄉科屢試
南省名在乙榜不欲就卒業太學成化丁未始拜
常之知縣則年踰五十矣公諱禧字天錫號尚綱
齋謝事後號黃花主人又其孫更號青山姓丁氏

世居豐城之古牛背高祖壽可曾祖尚文皆以節
菴尚書公貴俱贈刑部侍郎祖用堅號貧樂翁父
士顯號坦坦老人母艾岡余氏隱君南輝之女君
登薦剡二親俱存比釋褐惟母氏無恙扶持官中
承顏色備甘旨人謂公爲能養贈侍郎壽可公葬
且百年矣公列其事于東白張學士碑于神道人
謂公能不忘其先嘗以古者重宗子法程子言於
道書朱子寓於家禮今宗法不立於收族之道不
無踈略且以其身爲大宗子因立大宗堂此其於
家也居官不能俯仰取容遇事必直已志巡撫王

都御史克復爲人長者與公略勢分特加旌獎公嘗鞫成敗私鹽獄贓舡具在巡按史御史失出之旣而其人再犯公移文史曰今日之鹽徒即前日之鹽徒今日之賊舡即前日之賊舡吏胥謂公必賈禍懇爲遜言不聽史得之愧恨曰知縣乃許御史短耶必欲中之後君亦拂衣而歸矣其在江陰百修率民間僉役租庸戶籍丁驗務得其平尤好獎勵學校人才得其品藻率取科第以去如是已此其於官也公文思敏速詩句雄健蚤歲工時文即兼爲之晚年篇什尤多間閱篁墩程學士宋

紀受終考因作宋史大義盡翻其案蓋學士謂宋
太宗之於太祖必無篡弑之事而公以爲必有之
霜降水涸讀史所見如此此其於學也公配曾氏
族之長幼皆稱其賢子男三長即灝利塲屋器志
在進取次即瀚善治其家次滾邑庠生嘗從予游
進進未已先公二年卒孫男幾人女幾人曾孫幾
人君爲人骯髒豪爽有膽氣凡遇尊貴人見有曲
意奉承者輒不然之議論恥隨人後先是冢宰古
澹李公太守芝軒涂公洎先郡公家居倣古爲耆
英會公歸復招以入予嘗爲作青山吟以寄之未

云就使迂踈歸便得已輸觴味十年閑主墨次其終
下之樂爲不可及耳公平生應耐遊戲之作參不
存稿七旬前後始有古稀集前此惟宋史大義今
藏于家壽七旬又五卒于正德丁卯六月一日葬
于年月日墓在某鄉某里銘曰公任暮年大器晚
成一邑利害無不罷行至於科差罔有弗平飄然
勇退令之淵明內臺巡行手握重權下僚成風畏
若鼠然公知有法執之彌堅吾何畏彼令之董宣
換開豐水酒量詩懷一時衣冠勝日筵開古稀有
稿篇童兒才宋史有辦斧鉞凜我豈其跨鶴海天

翔翔尚有華扁大宗之堂曰雲曰仍以丞以嘗遺
休後人百世其昌

義官王公墓志銘

王君習周習鵠將葬其尊公而習鵠自為事狀來
徵予銘按狀公諱吉字順祥別號耐齋王氏世為
豐城槎溪故族曾祖伯榮祖好學父永昭俱有隱
操毋劉氏生公兄弟三人公其季也自少穎異嘗
為舉子業遭連失怙特門戶百責所萃乃弃去遊
衡湘為居積計與伯氏仲氏同爨共箸無者三十
年弘治初 朝廷令富民出粟濟飢時邑令劉

璽具書數請公出以應尋膺七品散官自是優待
林壑將二紀矣年八十一而終公於史書多能成
誦有所論斷往往出人意表時爲五七言近體詩
晚好周易其斷教家事以來以習周習韜挾鉅萬
貫收大利于外歲入倍素封者不知其幾而二難
者蓋商其迹而士其行其所以悅公之心志又有
出于恒情所尚之外者矣故公年益高家益富而
心益休休焉公平生不侵爲然諾多義舉最得宗
族心在江湖在鄉里率爲人所敬服公娶同里楊
氏賢德相對年亦逾八十先公卒子男四長習典

早卒次即習周次習中亦先卒次即習韜文一適
邑鄂江濩孫男六鏗鍊旻祖輝祖洪祖女一曾孫
男三善寶國寶世寶女二公卒正德庚午十月一
日葬以卒之明年 月 日初公相地于清江縣
蛟窟口之原既葬其配即曰異日當窆我于左至
是則遵以奉葬云銘曰宅卜異縣相望則邇葬有
遺言是爲合禮

熊君遠墓誌

諱光字君遠姓熊氏晉鄱陽太守縉之後唐宋
以來世家豐城 間自官店遷下坊自下坊遷原

山嶺原嶺之居率相去數里曰考坑曰店里皆原嶺
云君居考坑蓋自曾大父邦泰以來則然矣其地
寔孤山之麓統其屋皆層巒疊嶂亦奇秀矣哉君
讀書知大義待宗族姻交性耐久不飾僞心即其
口機擬變詐不惟不爲意者自少至老未嘗一起
念也嘗修其族之譜可謂知所重者君以上累數
世粟陳貫朽稱貸而負者券盈篋多置弗問輒助
有司賑飢輒解旌異之舉予爲兒時嘗見君之父
承祥甫縣數十艘載粟出縣治上常平義倉竟以
問閭白衣終其身視近年僅僅出數十金濟公家

之急即希寵冠裳覲表里宅稱義官義民者異矣
豈非有司負君亦數數耶承祥甫未三十而卒配
南莊黎氏生君君早以孤露利其有者環而視之
而卒有成立豈非家世積善之報歟君卒正德己
巳六月二十三日享年六十有五娶邑郭楊氏先
大夫之長女也先宜人莊敬寡默以身爲教故吾
姊酷似吾母君甚得其助於內今年已七十餘矣
男三庚靡應女二長適丁橋呂賢次適洞坑張軫
孫男四某某某女三君卒之年後九月十一日
葬清江縣雅村湖從堪輿家說戴午履子去家五

里許將葬庚等來乞墓中文予時未暇以爲旣葬復屢以爲言且曰窆于異縣尤不可以弗識也又重以吾姪之命之也乃收淚而爲之誌右以葬地

墓

封孺人華母楊氏墓志銘

封孺人華母楊氏乃封給事中華公諱守莊號聽泉之妻其伉儷並封以子參政相爲侍從于朝得推恩云孺人諱貞靜曾祖諱德讓祖諱連俱有士行晦跡田野間父諱麓字景怡號樂善通經學古亦晦迹弗以耀母吳氏淑而文定生孺人楊

在無錫始居西門里至璉贅鄒氏因居泰伯鄉孺
人少以德容聞同邑華隱君諱思濟號山桂爲季
子擇婚遂舉納采問名之禮而季子即聽泉也笄
踰年而歸事姑鄰甚謹有疾極力調護敬諸妯如
其姑雖服飾亦不敢視之或問之曰吾年幼當如
是也諸姑之女嫁姑命縫其衣夜以繼日未嘗辭
其勞也執舅姑之喪能致其哀祭祀視饌饗賓至
具肴馔皆自爲之不以委諸人甚至饁耕夫餉耨
叟或時取而品嘗焉煬人憚之無爲惡草以相欺
者聽泉治新第于塗蘇工鉅未亟就孺人出紈綺

織縞編鬻以爲助其勤其儉皆以身率人命服在躬
雖澣濯補綴之衣未嘗厭麻枲之治蓋終其身焉
每舉文公小學以訓諸子婦於訓諸孫婦亦然諸
孫婦有盛年嫠居者慰之尤至視以言謫官主南
京太僕簿殊不介于懷且以近家爲喜擢知韶州
府朱衣拜慶無矜容顧以嶺表爲慮頻行惟以寬
勉之類出常情之外嗚呼敬姜往矣孟氏陶氏之
母皆不得而見矣女婦之有識者歎矣若孺人者
庶幾有古賢母之風焉孺人雖履高年素康寧無
恙忽病疴兩月不粒食体羸憊而神思清明猶平

時子昂以棄進孺人曰吾年八十有二復何望耶
爲吾子孫者惟讀書爲好人則吾願足矣語畢而
逝寔正德辛未八月十有九日也先是經旬積陰
孺人數問天氣是日開霽晴明人以爲異孺人歿
聽泉亦歿相去僅八十日同德偕老人以爲難孺
人治家有緒事無不辦者卒之日華之族無慮數
千指自總小功以上成服之喪麻皆預貯外庫觀
內政者於此尤嘆其爲不可也子男二人長即昂
以義補官娶鄒氏次即相兩試比自高等主司輒
錄其文登二甲進士第改翰林庶吉士拜給事中

近隴貴州左叅政則自韶州奔喪至家而四朝命
始下焉娶朱氏繼惠氏一贈一封皆孺人女二長
適惠說次適錢溥孫男球早卒琳瓚琨琢環瑯女
二曾孫男四玄佑玄慶玄壽玄祚女一昺昶卜以
正德壬申秋九月之十有一日奉塋于塗林之西
原合於聽泉之兆先期以內兄郎中錢君榮之狀
來徵銘且曰合葬非古其來尚矣雖防亦然不可
啟也又曰襄陽峴山碑刻重複固陵谷之計也同
藏異志或者其可乎廉曰然乃按杖序於前而以
銘繫之于後銘曰錫山之陽遷于將柩自航而曹

遂爲士著西門泰伯亦鄉亦郭龜山之衣問尚敦儒
朴亦有華氏其采綿邈始南齊寶孝行超卓不援
之宗屹如山岳入于國朝重官累爵孺人之賢
早冠閨閣作配封君內政綽綽篤生令子言路諤
諤西原之阡左干右鎮尚有紅光霄漢是薄

楊文恪公文集卷五十七

碑誌

右副都御史矩菴陳公墓志銘

正德庚午矩菴陳公應簡陝都察院右副都御史奉勅巡撫湖廣兼釐理軍務先是公爲湖廣右布政使嘗率諸司官提兵破漢沔間劇盜擒其渠魁械至京師詔加褒獎人謂公能揚威外服厥功甚奇至是餘黨猶未盡平公曰以吾今日事權所在殲之尤無難者第念貧民迫於有司誅求之苦以至此耳於是奏請寬九恤得蠲其稅衆皆

散而歸農人謂公能宣朝廷恩德兵不血刃厥
功尤大逾年再奉勅覈事武岡盛置者中兼程以
進俄而得疾屢療弗瘳疏乞養病歸南京上以
一方安危所寄不即允再疏乃乞而公薨矣時
辛未冬十一月之朔日也得年統五十人無不哀
之者公諱鑄字宗之姓陳氏別號矩菴其先會稽
人曾祖諱一廉永樂間以甘石氏學徵赴南京遂
於欽天監占籍焉祖諱嵩贈右副都御史祖妣何
氏贈淑人父與竹先生領天順壬午鄉薦任鄞都
永豐豐城教諭棄職就封累封至右副都御史母

劉氏封安人贈至淑人生公洎公弟諒之二人成
化丁未春公以丙子鄉試第一人薦與諒之連列
續食而來會試南宮其年並捷並居高等對大廷
並登二甲進士第既而各授主事公得禮部諒之
得南京兵部丁劉淑人憂服除公得工部諒之得
兵部仍主事未幾公謂吾弟往者居南京得以奉
吾親時猶具慶也今惟老父在人子愛日之誠當
何如耶遂陳情得改南京吏部仍主事所以悅其
親者無所不至故與竹先生雖居都城闕闕之間
而有園池花木之適雖以青毡儒素之舊而實不

臧朋游觴味之豪也久之公以本部郎中陟山東
提學又久之諒之以廣平知府陟廣東提學皆副
使至公轉江西叅政則諒之下世至是公後下世
當公兄弟以英妙之年挺絕出之資高粹美官人
莫測其所至而詎謂其一且淪喪如此哉竊謂天
地之氣有清有濁有高有下有厚有薄有長有短
其鍾而爲人清者多賢高者多貴厚者多富長者
多壽否則反是然清與高厚與長未易以兼得也
公之兄弟豈適當其清高而不廷於長厚者歟與
竹先生暮年而值此使非明理之儒其將何以為

情哉公在山東其考較之公雖糊名易書殆不是
過至於激厲裁抑作成變化固有出于佔畢時好
之外者闕里舊無志書公承西涯李少師所屬遂
蒐羅成編見者謂其纂集有法在吾江西以地方
繹騷來旬來宣殫費心力其在部屬堂官嘗首舉
以應 詔在藩臬撫進憲臣數舉之公學博才俊
爲詩文藻思逸發類多不經人道語不然亦化腐
成竒其志直欲與古人爭衡不徒校工拙于一時
而已作字有風韻筆心灑灑落如其爲詩文如其爲
人所著有矩矱漫稿若干卷金陵人物志藏于家

其刊布者惟闕里志耳公與諒之天屬則同氣麗澤如交生自少至長未始暫離嘗言旣入仕始知有別已未獻績京師迂道廣平徘徊旬日更唱迭和有感于二蘇彭城之會以仰蘇名其郡齋諒之之廣東任公以按行濟寧邀至孔林謁廟而別嘗哀集詩林文苑哀挽諒之之作名悲鴈錄又自爲文以誌其墓惟恐其湮沒後世無知之者諒之雅尚風節視公稍廉隅其才與學吾不知其孰爲兄孰爲弟也所恨短折得年尤不逮公耳壬申之春適公樞至廉與羅圭峯克侍諸公以公同年亟

往哭之又亟往奠之傾其室皆無不哭之奠之者
而與竹先生以黃冬官所爲狀徵廉爲文以納之
幽廉不得辭而於諒之輒牽聯以書者猶叙宋庠
不得不及祁作劉敞傳不得不及放也葬期在某
月某日墓在江寧縣鳳西鄉之新塋始窆劉孺人
繼窆諒之皆于此茲復窆公大略如伊川葬穴昭
穆圖云公配方氏封至淑人所生惟一女名勝嘗
許知縣鄒禮之子瑟八歲而天銘曰雷雨送作雲
霞爛然遊戲人間我疑謫仙難茁靈靈之易竭醴泉
忽騎箕尾去而上天亦有叔兮往往無馬造化一

場垂光千年

處士王君墓表

豐城之槎溪孤懸于高安清江三縣之間其人相與爲婚姻於二縣視同縣爲多焉其交游亦然始予家居聞王氏爲其地著姓而已他不能詳也旣而一出往往識王氏于江湖間知其富且好禮而已他亦不能詳也久之乃知宋王義山提舉義端縣令寔出其族二公爲豐城表表人物劉頌溪會孟爲義山哀詞謂閩浙江淮間喜言其文文山爲廷試覆考官以所對策有直氣欲寘第二而爲

詳定官所抑所著有宋史提綱讀書管見宏詞藪
稿稼村類稿予近過槎溪之上得其類稿讀之而
於義端得其活囚錄及所爲文一二讀之乃擊節
而歎曰豈非孤羅之英劍水之靈鍾爲異人而所
謂文章有江山之秀發者歟予於是深愧寡陋前
此知王氏不盡也一日王氏曰冠以狀謁予爲文
以表其親之墓冠亦識之江湖間者蓋槎溪之封
胡羯末也且有瓜葛誼不容辭時予宅先郡公憂
未及爲免喪逾年乃克爲之按狀處士諱瓊字萬
琳號竹軒父同震祖仕禧曾祖伯泰俱隱不仕伯

春之祖平仲仕爲巡檢則義端之子也竹軒幼而嗜學長而孝友富而周人之貧不獨富焉配張孺人洞坑張弘鑑之女惟勤惟儉能相與以成其家甚有相之道焉竹軒晚歲鄉間倚以爲重事有弗平者多就之質或比之王彥方其與張孺人善相觀義相勉或謂於李渤聯德高蹈有相似者其終也竹軒以正德丙寅六月之廿三日張孺人以弘治癸亥七月之十日其合葬也以正德丁卯十二月之十日墓在其里小洲之原以指南測之正直卯酉蓋東向也子男二長黻次即冠女一適教

肇禧孫男三孫女一用是表之墓道使人知其爲
竹軒之裔暨其配于此而加敬焉

有明贈南京禮部主客司主事西溪范君墓
表

君范姓諱澄字本清西溪號也上世居汝陽唐乾
符中有仕閩者值黃巢亂途梗因留建州子孫遂
家焉今爲建之甌寧人曰德其曾祖曰直其祖曰
保其父連不仕君少穎敏書經目輒成誦年十四
補邑庠生自是而後雖習舉子業而有志聖賢之
學謂士當以真知實踐爲務豈徒工文詞媒利祿

而已由是躬行益力不先於言少孤痛父早世遇
忌日輒不食哀感如初喪奉毋張先意承志所謂
視於無形聽於無聲則信有焉長兄淵事之甚謹
家政巨細皆稟而後行食指旣衆兄以折爨爲言
雖不能止而遜讓之風視薛包輩初無愧色母歿
哀毀幾不欲生踰祥禫猶未肉食平生撫愛兄弟
之子過於己子家庭義方之訓尤嚴每於子姪論
學及復詳盡或至於日晏或至於夜分率以爲常
次子嵩登進士第補寧國推官手書戒飭拳以
持廉奉公爲言無一語及家事迨考績之京師

遺以踏費且以書曰聞汝宦邸蕭條以此
相助時嵩方燕會其宦家問適至座客傳觀歎息
謂君之心真古人也尤善睦族值窮乏者或授之
田廬或周之錢帛自奉甚薄而赴人之急未嘗少
靳里有曹某者舉息于人將鬻其妻君捐資贖之
俾爲夫婦如故終不責其報少年有盜池魚者君
得而釋之且丁寧守者勿泄其事鄉鄰有忿爭者
必詣廬求直有爲不善者咸畏君知之君造次以
禮雖鏹金之暑未嘗暫去衣冠待人表裏如一與
幼賤者接亦無惰容取予尤慎晚年好學不倦屢

躡塲屋未嘗少怠弘治己未應貢太學所交四方
名士無不推重之註選家居日課子姓不輟正德
戊辰得嵩擢御史劾報時已卧疾即起沐告子先
祠又逾月疾劇長幼請所命惟以勤儉忠孝爲勸
驕奢侈傲爲戒言畢瞑目而逝乃十月之三日也
距所生景泰辛未五月之廿二日春秋五十有八
配吳氏嵩以南京禮部主客司署郎中主事考最
蒙恩贈君爲主事吳封爲太安人云子男六人
長山次郎嵩次嶽早卒次崑次巖次歲孫男十有
三人昭暘晟昕暉宣昇旦晉春昱某某孫文四

歿之八年嵩一日來告曰先君篤學力行孜孜者
不及至於樂善好義尤人所難窮經三十餘年造
詣深遠使得行其所學其設施措置爲何如不幸
齋志以死非得知言君子表之墓道其何以發潛
德之幽光也哉今竊有請焉蓋君以某年月日葬
于某鄉某里之原墓是又若干年矣愧亦非曰能
文但於人子之心欲揚親之善有不忍於辭者况
嵩又在僚屬予每嘉其志操又不容於辭者遂按
其所爲事狀而書之俾之鐫于下棺之石

黃母李孺人墓志銘

黃君信民一日持其仲父太叅先生所爲其母孺
人之狀來徵銘且曰吾母之葬已四年矣墓中之
石尙未有書之者幸爲我爲之則吾母之賢將不
泯沒于後世矣予於信民忝在姻末夙有聞於孺
人之賢然知之悉者莫逾於其宗族故讀太叅先
生之狀而知之爲尤詳焉孺人諱妙俊姓李氏豐
城長安鄉聶坊舊族祖繹如仕爲縣丞父吉如貞肥
遯高蹈毋某氏甫笄歸于同邑荷塘黃君定之歸
而不及其舅而能敬事其姑姑晚年喪明飲食必
親授匙筯坐起必親自扶持未嘗少懈如一日以

至送終焉孝也中道孀居絕華飾甘澹素撫其孤
男一延明師以教之女二擇士人以歸之節也他
而女工針縷之精中饋調肺之善有不可得而盡
書也孺人春秋八十稱未亡人者四十餘年其生
以宣德戊申歿以正德丁卯越明年葬長寧鄉三
十六都 桐坑口戴乙履辛男即信民女之壻陸
璵朱瑄孫男淑沂滋 淑邑庠生沂夫女一曾孫男
五材林椅校櫻女一 嗚呼節孝二字在丈夫爲學
者恒或慊焉而婦人 女子往往因其天資之美而
能之豈所謂爲學者 未嘗矯揉其性而得於天者

有不假於學歟孺人曰少柔順貞靜則固得於天者之爲多也是宜銘銘曰維婦恒事兮絲枲酒漿孰逾節孝兮扶植綱常撮梗槩兮以鏡于歲庶壺範兮永流其芳

鄉貢進士劉君元素墓表

主事夏敦夫謂予曰尚朴亡友劉元素平時與之同爲舉子業若不相上下也及在太學一日督課甚急元素伸紙疾書未嘗屬草兩月程課不終日而畢尚朴意其爲嘔文逃責之計及取視之辭氣浩發議論層見皆已出非由蹈襲託憶而然始

服其不可及如此今歿且六年矣墓門之石非先生書之則後無有知元素者遂以所爲狀見授自予識元素于今十餘年矣識敦夫識元素之弟仲素皆同一時三人者予皆妄有評品謂元素性冲淡看道理平鋪眼前謂敦夫直欲於心地隱微處求得所以用功攔柄謂仲素風格俊爽文彩爛然又嘗得元素所爲詩文大抵舒徐容與沉浸醲郁似與敦夫所云少異豈爲時文則如彼而爲古文則如此歟今元素遂以不作悲夫元素諱絢字元素號定菴姓劉氏世居廣信永豐之霞方曾大父

清大父宗禮父伯安應

詔輸粟旌為義民三世

俱以善稱於鄉毋徐氏君幼有異質目過書史即能誦之於口少長肆力於學下筆滾滾有奇語年十三補邑庠生典學使者得其文讀之驚歎曰此子必魁天下自是聲譽日起屢試率居前列然不肯少貶帖帖以徇時好以故又困場屋年三十二始與仲素同薦于鄉元素常從鄉先生婁一齋學處一山寺數年終日危坐澄心討論諸經四書及程朱之書每質所疑於一齋水餅的破即造其微一齋深重之繼遊太學數請益於祭酒章楓山楓

山特加愛敬事關出處必與商略元素亦盡言無
隱面論未合退而作書陳古義以風之楓山喜曰
可謂愛人以德者也元素以成化丁亥六月十二
日生于霞方之里第正德辛未會試下第四月十
日卒于京師之逆旅年止四十有五卒之日縉紳
士弔者相屬於途如有爵者之喪娶楊氏子男三
長朝俞先一年卒次朝舉次朝宗女三皆適士族
以卒之文明年葬里之楊塢去家四里而遙元素
早歲豪邁好使酒以氣加人醒輒自愧或閉戶匿
數日不敢出自見一齋後再不萌作嘗有淫奔之

女至其室堅不納有登樓以相從者正色叱之下
凜然有曾男子顏叔子二人之風每論古人忠義
之事辭氣慷慨激烈悲壯聽者竦然朋儔燕集或
歌杜少陵憂時之作及岳武穆文文山詞調則其
志何猶可想見所著有詩文若干卷藏于家嗚呼
二氣交運雜慄不齊人得之以生宜賢智者之少
而愚不肖者之多然少者又徃徃夭折困窮近年
如安福劉毅視元素尤爲短命海內有志之士零
落殆盡此學寥寥一至於此苟使用力者衆豈不
有可望耶予於元素重有所感故不辭而書之然

則曠百世而相感其必有同於予者哉

易菴劉先生墓志銘

嗚呼先生今不作矣後生小子將何所取法耶先生諱行字本仁嘗讀易有得於大傳易簡之旨因號易菴自少至壯自壯至老慎行謹言蹈繩履準雖急遽苟且未嘗少失故自有道者視之則見其易而易之爲不可及自流俗視之則見其難而難之爲不可及矣昔人謂伊川程夫子謹禮四五十生應甚勞苦夫子曰吾日履安地何苦何勞他人日履危地乃勞苦也廉於先生亦云先生姓劉氏

豐城曲鎮人高祖漢中曾祖邦達祖貴文父尚寧
號毅菴其分派之詳見諸譜牒先生天質剛勁自
幼有志于學毅菴嘗挾高貲爲湖海遊晚而傳政
先生以親命亦游湖海平生足跡多在吳楚真揚
之間雖居旅次於書未嘗一日不觀於心未嘗瞬
息或放其所謂惟日孳孳斃而後已者耶緣是貲
益以落德益以避久之家居則不復出而年已五
十餘矣其在真揚嘗有別弟詩云兄從海上魚鹽
覓弟回雲間布帛求兩地行藏能畏慎一生終始
寡愆尤識者謂先生樂天循理視膠南諸人無愧

若寧戚輩矍若乎其後矣先生年逾八十遇朝
廷輦恩優老例得冠帶惟服深衣幅巾以終其身
有司歲鄉飲欲得山林處士懿德之尊以爲大賓
學校公議言必稱先生屢請竟不赴先生在宗族
鄉黨子弟後生望風歛肅出一語不當行一事有
失惟恐先生聞之至是以卒則春秋八十有八矣
卒之年正德庚午八月三十日也先生元配四安南
周氏繼危氏亦先卒子男四祉雍天俱周出岷城危
出禧側出一女許小嶺夏元隆而天孫男三治龍
孫驥孫女四先生初爲學未有門戶博觀泛覽尤

好杜甫詩其後於諸經最嗜易於諸儒之書最嗜
近思錄程氏易傳口誦心惟蓋已的然知有親切
處其用工一於性情上可謂深造自得之醇儒矣
先生家嘗應里長役齊民投牒戒子弟不得受人
一錢嘗挈五百金讓之諸弟尤致力於合族自修
其譜屬先郡公序之嘗采唐虞三代以來忠孝事
實爲忠孝錄以訓蒙士至於心得之妙則未嘗驟
以語人也葬之所

樹

葬之期

則正德

廉嘗謂先生力行可畏使及伊洛

之門其所就當不在尹和靖下廉之友莆田林

嘗亦以爲然先生先恭人母弟也在廉知之爲
詳是宜銘銘曰嗚呼先生卓然不群靜存動察行
知尊聞聞然日脩以至於老復無門徒後何以攷
攷之古人惟了此心無聲之詩無絃之琴世有知
德先生必貴我書此銘以告千歲

丁母劉孺人墓志銘

淮陰城西義官丁公士勵有賢配劉孺人焉其卒
也後公十二年其享壽也八十有六矣諸子將奉
柩合葬于公兆之右持推官甘君亨會所爲狀群
來請銘予自弱冠與公諸子游見公風神舉止如

晉王謝輩人物雖家大事繁綜理周悉不見有倥
偬勞苦之狀居常燕集張設豐盛而亦不至於極
力營辦妄爲糜費問之則知諸凡有孺人以爲之
助也及見公富日以增貸者無所怨於償還嘗有無
不爭而往恤匱周貧尤加之意問之則知公之仁
厚善處抑亦孺人之仁厚善處以爲之叅謀贊決
於中也孺人信賢哉旣成其家爲諸子建甲乙第
東西居乃傳政咫尺間驕慢往來子婦相率迎門
稍涉遲緩卽有警戒之言二子遊宦於外每家人
之官下必曰爲語吾兒丁氏自節菴司寇以本風

繁猶在人耳此足爲範於後人者也勉之是爲養
吾志矣二子受教惟謹竝能其官性簡淡衣不厭
澣食不厭糲見女婦珠翠錦綺之垂輒不悅謂奢
苟儉難先是公開家塾聘師儒以教諸子族之子
弟多就學焉旣成其子且成其族之其間學而
仕者歷歷可數則亦孺人勸公爲之也孺人姓劉
氏諱妙盛世家南昌聚族梓溪岡也叔瓚洪武中
以人才被薦授桂林灌陽筦庫職以李貫隱逸士
毋萬氏孺人勞讀孝經論語皆能指誦年十八乃
于歸焉時舅用剛公姑劉具慶在堂孺人事上使

下皆有禮甘旨之奉烹調皆適宜舅沒方築宅有
挾狐者青烏之術者謂亟賄我我能令鬼福偏及
人改奪造化在手孺人聞之謂天理無是徒公謝
絕其人人謂其識達真女中文夫也孺人所生男
四禴綺皆忠厚益豐其積禴娶苦竹周氏綺娶同
造孫氏袍山東布政司檢校未幾諸路交上其
才迂鄞縣丞尋以孺人年高懇乞終養娶長安蔣
氏祐兩任驛之直河雷鄉丞娶小塘李氏女二長
適隱溪徐廷璣次適小港鄔時化孫男十二人洪
漸湛漑汶滔沐澆溫湘滂淙洪聽選官先卒漸國

學生潘淙字學生孫文四曾孫男三棠裴來孺人
之生以永樂癸卯七月二十九日卒以正德戊辰
四月二十四日葬以己巳十二月初十日墓在大
順鄉褚山南角之陽戴丑履未郵縣嘗視予以太
宰李公爲銘其考墓之文其墓戴癸履丁並南向
云銘詩三章二章章六句一章四句家人之卦女
貞爲先國風之首篇章諸篇孺人有之可謂曰賢
於維劉宗郡邑之望慶鍾孺人名闕之相世稱共
牢亦鮮同丘旣合禮經夫復何求各有銘辭用昭
千秋

甘君亨讓墓志銘

君諱永字亨讓號文菴野人姓甘氏豐城賢能坊人甘邑故大家也曾祖諱孟進封禮部主事祖諱瑛仕終邵武知府父諱元昭隱居不仕號棠松母徐氏繼母楊氏君自少簡伉不樂與群兒嬉遂邵武公延明師開西塾以誨之於其冠若婚比攝經行古三加奠鴈禮鄉俗二禮久廢至是皆從君觀焉君蚤從族叔父紹聖先生學既而卒業于涂太守有年先生治周易於場屋題意有講貫不筆理勝於詞未幾棠松去世以孤子當室遂去不復為中

年以後田園生產之外日以教子爲事旣以爲之
擇師復以爲之擇友時時携肴饌赴齋館或命題
以試其作手或背書以觀其記誦蓋君之所欲爲
而未遂者將以屬之諸子故其用心如此一時教
子之篤未有或之先也君自處儉素不務華靡見
華靡者甚不然之循理守義絕無妄取於人見怙
勢武斷者必盡言以譏評之予於君少共學者三
年卧同榻者二年可謂親且昵矣然君不好謏予
亦拙直每一相見有過必聞予嘗游宦而歸平生
故舊言之而無所隱久之而敬不衰者自君之外

指不多屈也君雖隱處最能陽秋宦途人物非果
於忘世者卒正德庚午九月之五日享年六十有
一配北門孫都憲之孫女婦道修整可謂曰賢子
男二拱栻俱治周易爲邑校生娶丁太叅之孫女
生子侯子繼周氏今繼熊氏者拱也娶袁氏生子
蘭孫者栻也適進賢張拱適李家宰曾孫醫官李
浩其二女也嗚呼君宜享高壽平生教子宜及君
之存而見其撥科第取青紫仙遊之遽爲相知者
可勝悼哉拱等將以卒之明年冬十一月之 日
奉柩葬于下梅芙蓉橋之原去巢松墓數十弓先

事持其從伯父亨會節推所爲狀來徵銘誼不可
辭也乃銘之銘曰議論諤諤風神堂堂用世之心
付之諸郎是宜有銘吾銘其藏

員外郎葉君時勉墓志銘

君諱釗字時勉號勉軒一號豐川子姓葉氏豐城
南巷人曾祖本華祖清父瑋封刑部主事母熊氏
贈安人繼母朱氏封太安人君生而穎異幼多病
主事君教子之心盛視病稍愈即令就學不使頃
刻曠廢年十五六治舉業已有聲旣而連困場屋
愈肆力於學固一有遠出乎時文之外者矣弘治辛

酉江西鄉試以第二人薦明年壬戌登二甲進士
讀卷官大司寇閔公珪得其卷而異之越數日觀
政刑部候門吏居傲不爲禮君命從者叱之吏益
不遜乃白之閔公公大咲曰我前讀汝卷固疑爲
氣節士今果然也立鞭其吏癸亥八月授南京刑
部廣東司主事部例始到官率提牢一月君見久
繫淹滯者皆制於貴戚不敢決請決之堂官不之
許固請終不許同列皆微咲之其後少司寇張公
撫握篆下其事於君張公廉慎人初不知其故旣
覺而悔欲寢罷之君力爭曰刑部大法司尚不能

平究獄寃何時而平乎萬一有禍願以負當之
無相累也張公不能止悉按諸貴戚如法值考察
京官人有積私怨者爲飛語于吏部以毀君張公
謂自某入部如其事某事經歷幾年而他官皆搖
手相避獨葉某毅然任之厲官所未有也衆皆嘆
服廣東司所治應天諸縣十三司事無繫於此者
復多憑藉掣肘間有奸黠者知不易斷則佯爲危
語以怖之異其告調他司以免禍惟君事入手必
直窮到底其告調他司者力言於堂官以沮格之
於是豪強屏息良善得所訴矣民有訟中貴奪其

盧洲歲收利不下五百金君判以歸之民湖廣委
官織造段疋價以萬計蓋歲例也機戶有欲專其
利者逆于數百里外以賄之委官悉以相付有二
機戶不能平訟于刑部復賄問刑官事卒敗露部
堂屬之君同列懼發其隱君惟罪二機戶并委官
而以價均派之他無所及一機房稱平人謂君知
大体嚴而不苛在湖廣司郎中於琮訊功臣家事
有婢妾恃勢侮玩者君在座不平命隸卒笞之婢
妾素驕悍歸自經死守備中貴知君強項揚言請
謝過即已否則以聞蓋以嘗斲盧洲意在修德

與進理弄權事不可測堂官洎同僚慮相及及愛
厚君者皆勸君一往君終不聽以爲天生天殺人
豈能害人守備以聞竟逮至京師下錦衣獄人
人危之賴皇上聖明錦衣官秉公無能媒孽一
髮然亦褫職放歸田里踰年公道大明吏部薦赴
爲禮部儀制司員外郎而君卒矣命下去君之卒
僅七日君以主事三年獻績于朝家宰許公進
閣南京部院考語有學問優長之稱乃謂君曰以
汝爲提學官年資未及立命文選司轉君爲本部
湖廣司員外郎君在部遇朝廷大事輒往往直

言以義理為主不顧利害甲子南畿災荒上四事
一脩君德二止盜源三禁民害四清刑罰乙丑
應詔上八事一正君心二選將材三擇奉要
四用讜言五守成憲六崇大体七絕異端八革
冗員丙寅二疏其一欲將給事中戴銑徐蕃收相
等六人寬釋以來忠直其一欲將尚書劉大夏復
用以收入望凡其所言有綱領有本末皆鑿々可
行之理真蹇蹇匪躬之風其餘因事陳言如論大
理寺止該叅駁兩法司招擬不當用刑拷訊如論
刑部大理寺堂官會問獄因序坐宜照品級寺丞

不當居侍郎之上初聞人或以爲狂旣而得旨
俞允人服其識終而翕然以定君性剛允持正守
法居官人不敢犯庭無留獄嘗謂事決之早亦可
以杜請託故南都有葉一火之誣君治身務本之
心爲學必求其理以是而稱量於事爲之間則有
非人之所能易及者矣爲文章不帖帖就窠臼直
寫其胸中所得與所欲言耳平生著述有服辨有
詩文積稿成帙在仕允孜孜於學公退必觀書至
夜分閑居獨處雖初寒暑雨冠服儼然見人不善
或面斥則有之若流俗歇後譏刺語平生未嘗一

道也使天少假之年則其造詣建立與夫發明理
道之作吾不知其所至矣惜也年僅四十有三耳
君歸田後南遊湖湘往來嶽麓石鼓二書院之間
尋朱張二先生之遺跡而致其遐思焉則其志可
知矣未幾遂卒其地乃正德伍年 月 日也王
事君不禁顏路之痛携君之長似孤童子往歸視
于衡山縣將葬君之第舉人銘爲伏以予書其
墓中石君斷大獄極多銘不能盡知今所列十不
一二皆人所傳道者若諸章奏則其手稿幸有存
焉予嘗家居授徒主事君遣君來學時甚奇之凡

考易以語他人者以語君既而予官南都又之而
君亦至每相見亦惟論學耳至於政事不能盡知
也一日惟聞予友周伯承郎中言曰吾部堂之尊
某者始至日作威以臨吾輩屬官未有爲之抗一
詞者間以加時勉時勉爲之辨論侃侃略不少屈
此公不覺語塞遂爲之改容吾時勉信男子也此
則同列之推服其剛者如此嗚呼若予者驥尋老
境平生屬望惟君而君乃溘然先逝其所以爲無
窮之悲者可勝道耶君配熊氏封安人子男二長
某次某君之葬以卒之明年 月 日墓在某鄉

某里之原銘曰自古剛士寔難其人緊君平生庶
幾其倫孔聖有云剛未之見周子亦然而曰剛善
學苟有見其行必方於道則然匪偏於剛任人所
避言人不敢選而吐舌闕茸破膽豈壁而碎乃金
而堅真金自精白璧自全

縣丞朱君墓志銘

君諱光甫字廷輝以字行號梅雪軒姓朱氏宋紹
興中教諭用衡由新安徙豐城世居邑郭之大井
巷君曾大父孔瞻太父仲芳父有容連不仕朱氏
自用衡以乘國賓丞瀏陽友鄴判建寧綾尉分寧

入 國朝 教諭有外 子正其科 臣國 業 君自少有進取志 初治經爲舉子業 旣而悅就 有司之辟 遂通刑名學 出是歷外臺者六年 歷內臺者三年 待次於家者十年 弘治庚戌始受監利丞 癸丑以母喪去官 丙辰補任龍泉 己未 朝覲謝 聖君在監利 修泮宮 賑飢民 息豪右 武斷之風 嚴軍校 侵奪之禁 其所爲有令不能爲 與不敢爲者 在龍泉 適四郊多盜 且撫且捕 未半歲而平 獲倍人死 必焚其屍 謂之火葬 君爲漏澤園 命舁棺瘞之 漏榜牆壁 犯者論如律 嘗擢檄隄濬 江先 是任

事者數歲無成君至乃成既堅且速又嘗捧檄視
篆夷陵剪豪雉強柔弱得想此則在監利時也民
間有舊吳新朱之頌此則在龍泉時也君脩然長
身藹然和氣退然若不勝衣解官後與林下諸人
相半結社出祿俸餘資以佐費不靳惜如是者凡
若干年卒正德丙寅十月二十八日距其生正統
壬戌 月二十九日壽六十有五君屬纊時既絕
而蘇集家人語曰人恒謂有鬼無之適來但覺日
暝耳嗚氣漸不屬此殆所以死歟居常於事類能
體認故其見於臨終者如此配鄴氏維余氏

四顯邑庠生雲玉濬鎮後事鄧出也冕邑庠生余
出也女二皆鄧出長適楊某次適熊某孫男五孫
女四諸子將以正德壬戌十月 日奉葬于 鄉
里之原顯以鄉貢進士甘君所為狀附至南京
屬予為之銘予與顯有連重違其意乃次其事而
銘之銘曰丞何負人人或負丞嗚呼朱君在在著
稱拂袖之早豈恋斗升異世譚君猶足以興

揚文恪公文集卷五十七